



Broj: 04-04-4-1128/23  
Sarajevo, 6. 4. 2023. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA  
„PRAĆENJE REALIZACIJE PREPORUKA IZ IZVJEŠTAJA 'USPOSTAVLJANJE  
EFIKASNOG SISTEMA PLANIRANJA I DONOŠENJA STRATEGIJA FBiH“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja „Uspostavljanje efikasnog sistema planiranja i donošenja strategija Federacije Bosne i Hercegovine“, objavljenog 2021. godine. Cilj je bio ispitati aktivnosti koje su revidirani subjekti preduzimali na osnovu Izvještaja i ocijeniti u kojoj mjeri su date preporuke realizovane.

Ispitane su aktivnosti Parlamenta FBiH, Vlade FBiH, Federalnog zavoda za planiranje razvoja i 16 federalnih ministarstava, koje su preduzete na realizaciji devet datih preporuka. Utvrđeno je da je većina revidiranih subjekata preduzimala određene aktivnosti na realizaciji datih preporuka, ali da one nisu bile dovoljne kako bi se otklonili nedostaci u planiranju i donošenju strategija. Od ukupno 19 subjekata, samo šest je realizovalo sve date preporuke, a ostali su ih u najvećem broju djelimično realizovali.

Praćenje je pokazalo da su se nakon višegodišnjeg odgađanja počeli primjenjivati podzakonski akti doneseni još 2019. godine na osnovu Zakona o razvojnog planiranju, i da je u 2022. godini donesena Strategija razvoja FBiH 2021–2027. Međutim, i dalje postoji potreba za unapređenjem regulatornog okvira, kako bi se jasno propisale obaveze nadležnih institucija u procesu planiranja i vršenja nadzora nad poštivanjem rokova izrade sektorskih strateških dokumenata. Također, nije okončana izrada podzakonskog akta kojim bi se uredilo povezivanje strateškog, razvojnog i investicijskog planiranja s planiranjem Budžeta FBiH, te omogućila efikasna realizacija strateških prioriteta FBiH.

Utvrđeno je da nije uspostavljen rad Vijeća Federacije kao savjetodavnog tijela, čime je izostala njegova uloga u procesima definisanja, implementacije, monitoringa, evaluacije i izvještavanja o realizaciji razvojnih prioriteta u Federaciji. Preduzete su aktivnosti na unapređenju evidencije o strategijama, ali one i dalje ne sadrže cijelovite podatke o svim sektorskim strategijama i izvještaje o njihovoj implementaciji. Nisu osigurani ni transparentni podaci o statusu sektorskih strategija koje su dostavljane Parlamentu FBiH na usvajanje.

Uzimajući u obzir značaj i ulogu strateškog planiranja za razvoj Federacije BiH, Ured za reviziju cijeni da je neophodno dodatno angažovanje nadležnih institucija kako bi se realizovale date preporuke i time doprinijelo unapređenju stanja u predmetnoj oblasti. Efikasan proces strateškog planiranja prepostavka je za ostvarenje društveno-ekonomskog razvoja, učinkovitije upravljanje javnim novcem i ispunjenje zahtjeva za korištenje EU fondova.

GENERALNI REVIZOR

Dževad Nekić

